

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN MOHD NIZAR BIN ZAKARIA
[PARIT]
TARIKH : 17 JULAI 2019 (RABU)

SOALAN NO. 63

Y.B. TUAN MOHD NIZAR BIN ZAKARIA [PARIT] minta **MENTERI KEWANGAN** menyatakan:-

- (a) adakah kemasukan Malaysia ke dalam Senarai Pemantauan Negara Manipulator Mata Wang oleh Jabatan Perbendaharaan Amerika Syarikat (AS) akan menonjolkan negara ini sebagai negara manipulator mata wang antarabangsa; dan
- (b) apakah sebab serta punca utama negara Malaysia disenaraikan ke dalam Senarai Pemantauan Negara Manipulator Mata Wang.

JAWAPAN

Tuan Yang di-Pertua,

1. Pada 28 Mei 2019, Jabatan Perbendaharaan Amerika Syarikat (AS) telah mengumumkan hasil laporan Senarai Pemantauan Negara Manipulator Mata Wang (*Currency Manipulation Watchlist*). Pemantauan ini dilakukan bagi mengenal pasti rakan dagang AS yang memanipulasi mata wang.
2. Mana-mana negara yang mempunyai jumlah dagangan melebihi USD40 bilion setahun dengan Amerika Syarikat akan diperiksa oleh Perbendaharaan AS untuk penelitian lanjut. Terdapat 21 negara yang memenuhi syarat tersebut, termasuk Malaysia. Daripada 21 negara tersebut, semua negara yang memenuhi 2 daripada 3 syarat lain akan dimasukkan dalam Senarai Pemantauan Perbendaharaan Amerika Syarikat, dan ini termasuklah Malaysia. Sesebuah negara hanya akan dinamakan sebagai manipulator mata wang jika ia memenuhi semua tiga syarat yang ditetapkan.
3. Perlu ditegaskan bahawa walaupun disenaraikan dalam *Currency Manipulation Watchlist*, Malaysia tidak dilabel oleh AS sebagai negara yang memanipulasi mata wang. Malah sebenarnya, kemasukan Malaysia dalam senarai tersebut bersama dengan negara-negara pedagang utama dunia yang lain seperti Jepun, Jerman, Korea Selatan dan Singapura hanya menonjolkan kekuatan negara serta peranan yang dimainkan oleh Malaysia dalam ekonomi dunia.
4. Malaysia dimasukkan dalam Senarai Pemantauan tersebut di atas dua faktor. Pertama, Malaysia mempunyai lebih dagangan dengan Amerika Syarikat melebihi USD20 bilion setahun. Kedua, Malaysia mempunyai lebih akaun semasa yang sihat melebihi 2% berbanding KDNK.
5. Kedua-dua faktor ini hanya menonjolkan daya saing ekonomi Malaysia dan bukannya bukti berlakunya manipulasi mata wang. Tambahan lagi, kita dapat

NO SOALAN : 63

membuktikan daya saing Malaysia dengan melihat prestasi Malaysia dalam Indeks *Doing Business 2019* oleh Bank Dunia dan laporan *World Competitiveness Ranking 2019* oleh IMD. Dalam laporan Bank Dunia, kedudukan Malaysia telah meningkat 9 anak tangga kepada tempat ke-15 berbanding tempat ke-24 pada tahun sebelumnya. Dalam laporan IMD pula, Malaysia merupakan negara yang ke-22 paling berdaya saing di dunia, mengekalkan kedudukan yang sama seperti tahun lalu.

6. Malaysia tidak memenuhi syarat ketiga. Seperti yang diperakui dalam laporan Perbendaharaan AS, Malaysia tidak campur tangan dalam pasaran pertukaran mata wang asing dengan tujuan melemahkan nilai ringgit. Oleh itu, Malaysia tidak digelarkan sebagai manipulator mata wang. Tambahan lagi, Bank Negara Malaysia telah menekankan bahawa Malaysia menerima pakai rejim kadar pertukaran terapung dan sebarang intervensi yang dilakukan adalah bagi mengelakkan daripada berlakunya perubahan kadar pertukaran yang keterlaluan. Oleh itu, penyelaraiannya tersebut tidak membawa kesan kepada Malaysia, dan tiada denda atau sekatan ekonomi akan dikenakan terhadap Malaysia.

7. Malaysia akan terus mengukuhkan daya saingnya secara adil melalui penggunaan teknologi terbaharu, pelaburan infrastruktur, meningkatkan ketelusan, dan memudahkan proses kerajaan dan perniagaan, sambil menggalakkan perdagangan bebas di rantau Asia dan di seluruh dunia.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH SOALAN : 17 JULAI 2019 (RABU)

SOALAN NO. 64

Minta **MENTERI PEMBANGUNAN USAHAWAN** menyatakan sama ada Kementerian telah menjalankan audit kewangan dan harta intelek terhadap Aerodyne Group, mengenai projek kereta terbang pertama negara yang dipromosikan oleh Kementerian. Jika ya, sila terbitkan keputusan audit tersebut.

JAWAPAN

Tuan Yang Dipertua,

1. Kementerian telah mengenal pasti industri *Air Mobility* sebagai salah satu *game changer* yang mampu menjana pertumbuhan ekonomi dan membangunkan Perusahaan Kecil dan Sederhana (PKS) di Malaysia. Industri ini mempunyai potensi yang tinggi di pasaran tempatan dan antarabangsa terutama dalam sektor infrastruktur, keselamatan, pertanian dan lain-lain. *Air Mobility* ini mengaplikasikan teknologi terkini seperti *Artificial Intelligence (AI)*, *Big Data*, *Mobility* dan *Internet of Things* yang sedang berkembang pesat terutamanya di peringkat antarabangsa.

2. Kementerian sekadar memainkan peranan sebagai pemudah cara dalam pembangunan ekosistem industri terutamanya dalam aspek sokongan industri dan kapasiti syarikat tempatan untuk membangunkan industri ini. Projek ini diterajui oleh sektor swasta dan dibiayai sepenuhnya oleh Aerodyne Group, sebuah syarikat tempatan. Selain daripada Aerodyne Group, Kementerian juga turut bekerjasama dengan lain-lain syarikat yang terlibat dalam sektor yang sama seperti Fourfang dan Strand.

3. Kementerian Pembangunan Usahawan telah dijemput menghadiri prosiding berhubung Pembangunan Projek *Air Mobility* pada 14 Mei 2019 oleh Jawatankuasa Kira-Kira Wang Negara (PAC) dan telah memaklumkan kepada PAC beberapa perkara seperti berikut:

(i) perkembangan semasa dan justifikasi projek *Air Mobility*;

(ii) pembangunan prototaip *Air Mobility* serta hak milik intelektual termasuk reka bentuk dan perisian *Air Mobility* adalah di bawah tanggungjawab syarikat yang membangunkan projek tersebut, termasuk kos berkaitan di mana pihak Kementerian tidak membelanjakan sebarang peruntukan; dan

NO. SOALAN: 64

(iii) maklumat tambahan berhubung syarikat-syarikat yang terlibat seperti mana yang dipohon oleh PAC juga telah dikemukakan pada 21 Mei 2019.

4. Ingin dijelaskan di sini bahawa tiada keperluan supaya Kementerian menjalankan audit kewangan dan harta intelek ke atas syarikat Aerodyne Group kerana projek ini bukanlah merupakan perolehan Kerajaan yang biasa dijalankan. Projek ini tidak melibatkan sebarang peruntukan daripada Kerajaan dan Kerajaan tidak akan menanggung sebarang kerugian sekiranya projek ini tidak berjalan seperti yang dirancang.

5. Walau bagaimanapun, prestasi kewangan syarikat Aerodyne Group boleh dinilai melalui penyata kewangan tahunan yang telah diaudit oleh juruaudit luar selaras dengan kehendak Akta Syarikat 2016.

Sekian, terima kasih.